

四庫全書

集部

欽定四庫全書

集部

宋元詩會卷五十一

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣牛稔文

謄錄貢生臣齊兆求

欽定四庫全書

宋元詩會卷五十一

兵部主事陳焯編

文天祥

字宋瑞又字履善吉水人自童子時見學宮所祠  
鄉先生皆諡忠即欣然慕之年二十舉進士對策  
集英殿一揮萬言文不起草理宗親拔為第一丁  
父憂服闋為寧海軍節度判官遷刑部郎中出守  
瑞州改江西提刑入為尚書左司郎權直學士以  
草制忤賈似道罷歸遂請致仕時年三十七耳咸  
淳九年起湖南提刑明年改知贛州德祐初結義  
兵勤王至臨安除知平江府元兵破常州入獨松

關天祥退守餘杭明年正月除知杭州府旋拜右  
丞相兼樞密使如軍中講和與巴延抗論皋亭山  
拘之使北行至鎮江天祥夜亡入真州苗再成迎  
之商用兩淮兵為興復計會有行反間者淮帥疑  
之其事中阻天祥乃航海達溫州行在拜右丞相  
與陳宜中等議不合乃以同都督出江西收兵入  
汀州再移漳州進復贛屬諸縣俄而兵潰天祥妻  
妾子女皆被執天祥收殘兵奔循州屯麗江會益  
王殂衛王繼立天祥上表自劾乞入朝不許因加  
天祥少保信國公進屯潮陽元帥張弘範兵突至  
執之天祥吞腦子不死弘範委曲誘降弗得遂遣  
使護送至燕坐臥小樓三年不屈死年四十七天  
祥忠義動天地泣鬼神其載宋史本傳者  
出時宰手多失實惟考指南錄庶幾得之

山中感興

三首

載酒之東郊東郊草新綠一雨生江波洲渚失其足青  
春豈不惜行樂非所欲采芝復采芝終朝不盈掬大風  
從何來竒響振空谷我馬何玄黃息我西山麓

山中有流水霜降石自出驟雨東南來消長不終日故  
人書問至爲言北風急山深人不知塞馬誰得失挑燈  
看古史感淚縱橫發幸生聖明時漁樵以自適

桃花何天天楊柳何依依去年白鳥集今年黃鵠飛昔  
爲江上潮今爲山中雲江上潮有聲山中雲無情一年

足自念况復百年長但存松栢心天地真茫茫

送行中齋 二首

秋氣晚正烈客衣早知寒把衣不能別更盡此日歡出門一萬里風沙浩漫漫豈無兒女情爲君思洊瀾百年有時盡千載無殊觀明明君臣義公獨爲其難寧受百折苦願持一寸丹會須撫卷人孤燈起長歎

神龍蕩失水馴擾終未得威鳳雖在數甯顧鷄鶩食所以古至人受變心不易毫鼎已遷周西山竟肌瘠豫子

身自漆長弘血成碧何嘗怨廢興而或二心跡堅白不  
在緇羔裘良自惜此義公素明俗見或未識

題宣州疊嶂樓

初日照高樓輕煙在疎樹峨峨遠岫出泯泯清江去簷  
隙委殘雷屋隅連宿霧蒼蔚互低昂熹微分散聚城郭  
諒非昔山川儼如故童鬢已零落姝顏慰遲暮沉沉澹  
忘歸欲歸重回顧

東方有一士

萬金結遊俠千金買歌舞丹青映第宅從者塞衢路身  
爲他人役名聲落塵土他人一何傷富貴還自苦東方  
有一士敗垣半風雨不識絲與竹飛雀滿庭戶晨餐或  
不飽夜夢無驚寤此事古來多難與俗人語

送劉其發入蜀

秋風淒已寒蜀道阻且長虎狼伏原野欲濟川無梁客  
從何處來云我之西方蕭蕭驕驕鳴熠熠湛盧光昔時  
榮華地今爲爭戰場將軍揚天戈壯士發戎行江南有



羈鳥悠悠懷故鄉  
駕言與子遊雲天何茫茫

發魚臺

晨炊發魚臺  
碎雨飛擊面團團  
四野周冥冥  
萬象變疑是江南  
山煙霧昏不見  
豈知此中原  
今古經百戰  
英雄化爲土  
飛霜洒郊甸  
天寒日欲短  
遊子淚如霰

發陵州

中原似滄海  
萬頃與雲連  
朝暾欲東出  
皎月正在天  
遠樹亂如點  
桑麻鬱蒼煙  
一雁入高空  
千鴉落平田  
我行

天地中如蟻磨上旋雨痕留故衣霜氣襲重氈健馬嘶  
北風潛魚樂深淵噫哉南方人回首空自憐

贈許柏溪惟一

長風吹飛藿蜻蛚吟野草流光速代謝興懷令人老遊  
子中夜起悠悠酣且歌明月委清照江湖秋涉多豈無  
臨淄魚亦有邯鄲酒懷古招王孫登高重回首

正氣歌

余囚北庭坐一土室室廣八尺深可四尋單扉低小

白間短窄汙下而幽暗當此夏日諸氣萃然雨潦四  
集浮動牀几時則爲水氣塗泥半朝蒸漚歷瀾時則  
爲土氣乍晴暴熱風道四塞時則爲日氣簷陰薪爨  
助長炎虐時則爲火氣倉腐寄頓陳陳逼人時則爲  
米氣駢肩雜遝腥臊汙垢時則爲人氣或圍溷浮苑  
或腐鼠雜出時則爲穢氣疊是數氣當者鮮不爲厲  
而余以孱弱俯仰其間于茲二年矣是殆有養致然  
爾然亦安知所養何哉孟子曰我善養吾浩然之氣

彼氣有七吾氣有一以一敵七吾何患焉况浩然者  
乃天地之正氣也作正氣歌一首

天地有正氣雜然賦流形下則爲河嶽上則爲日星于  
人曰浩然沛乎塞蒼冥皇路當清夷含和吐明庭時窮  
節乃見一一垂丹青在齊太史簡在晉董狐筆在秦張  
良椎在漢蘇武節爲嚴將軍頭爲嵇侍中血爲張睢陽  
髯爲顏常山舌或爲遼東帽清操厲冰雪或爲出師表  
鬼神泣壯烈或爲渡江楫慷慨吞狼穴或爲擊賊笏逆

豎頭破裂是氣所磅薄凜烈萬古存當其貫日月死生  
安足論地維賴以立天柱賴以尊三綱寔係命道義爲  
之根嗟余遺陽九隸也寔不力楚囚纓其冠傳車送窮  
北鼎鑊甘如飴求之不可得陰房闐鬼火春院閤天黑  
牛驥同一皁雞栖鳳凰食一朝蒙霧露分作溝中瘠如  
此再寒暑百沴自辟易嗟哉沮洳場爲我安樂國豈有  
他繆巧陰陽不能賊顧此耿耿存仰視浮雲白悠悠我  
心悲蒼天曷有極哲人日已遠典刑在夙昔風簷展書

讀古道照顏色

贈蜀醫鍾正甫有感

炎皇覽衆艸異種多西州爲君望岷峨使我雙淚流向  
來秦越人朝洛夕邯鄲子持鵲經來自西亦徂南江南  
有羈羽豈不懷故營何當同皇風六氣和且平

有感

石郎草草割山川一落人手三百年八州風雨暗連天  
三皇五帝如飛煙人人野祭伊水邊春秋斷爛不復傳

白頭潦倒今魯連夜深危坐日晏眠

青原寺 二首

鐘魚閒日月竹樹老風煙一逕溪流滿四山天影圓無  
言都是趣有想便成緣夢破啼猿雨開元六百年

空庭橫蟬蛸斷碣偃龍蛇活火叅禪筍清泉透佛茶晚  
鐘何處雨春水滿城花夜影燈前客江西七祖家

翠玉樓

昏鴉何處落野渡少人行黃葉聲在地青山影入城江

湖行客夢風雨故鄉情試問東南信梅花三兩英

阜蓋樓

一水樓臺遶半空圖畫開蝸涎行薜荔雀影上莓苔碧  
落人千載青山酒一杯晚煙看不盡明日卻歸來

長溪道中和張自山韻

夜靜吳歌咽春深蜀血流向來蘇武節今日子長遊海  
角雲爲岼江心石作洲丈夫竟何事底用泣神州

即事



去年傷北使今日歎南馳雲溼山如動天低雨欲垂征夫行未已遊子去何之正好王師出崆峒麥熟時

英德道中

海近山如沃林深屋半蕪乾坤正風雨軒冕總泥途自歎鳶肩薄誰憐鶴影孤少年狂不醒夜夜夢伊吾

建康

金陵古會府南渡舊陪京山勢猶盤礴江流已變更健兒徙幽土新鬼哭臺城一片清溪月偏于客有情

真州驛

山川如識我故舊更無人俯仰干戈跡往來車馬塵英  
雄遺算晚天地暗愁新北首燕山路淒涼夜向晨

送曹大著知廣德軍

暫屈瀛洲客來臨汭水民山川歸史記岳牧屬詞人館  
舍朋簪舊都門祖帳新儒林官可紀何止吏稱循

題吳城山

龍行人鬼外神在地天間彭蠡石砮出洞庭商舶還秋

風黃鵠遠春雨白鷗閒雲際青如粟河流接海山

文山即事

宇宙風煙濶山林日月長開灘通燕尾伐石割羊腸盤  
谷堪居李廬山久姓匡知名總閒事一醉擢滄浪

山居和韻

白扇揮殘暑青鞋踏嫩晴花牀尋小隱石鼎引長鳴紗  
帽有時去酒壺惟意傾山僧痴與坐閒卻瘦彌明

病中

驟雨知何處一溪秋水生苦吟肩鶴瘦多病耳蟬鳴隱  
几惟便睡挑書正倦行山深明月夜弓我半窗清

別謝愛山

君今拂衣去我獨枕書眠一片過林雨數聲當戶蟬情  
長空有恨吟苦不成篇後會知何日西風老雁天

病愈簡劉小村

倦餘心似醉病起首如蓬黃竹斷橋雨白蘋長笛風仙  
仙鷗屢舞咄咄雁書空孤負秋來眼閒挑爨下桐

曉起

遠寺鳴金鐸疎窗試寶熏秋聲江一片曙影月三分倦  
鶴行黃葉痴猿坐白雲道人無別事抱膝看回文

別里中諸友

青山重回首風雨暗啼猿楊柳溪頭釣梅花石上尊故  
人無復見烈士尚誰言長有歸來夢衣冠滿故園

拜羅氏百歲母之明日主人舉酒客賦詩喜而趣

韻

翠微三島近畫閣五雲橫春水鷗聲滑夕陽鴉背明尊  
前持一笑花下臥餘醒曾見瑤池母不爲虛此生

醉清湖上三日存叟獨不在坐即席有懷

石鼎吟方透瑤觴醉未闌疎林花密綴舊壘燕新安春  
半湖山好夜深江海寒王孫隔芳草初月正相看

題楚觀樓

西風吹感慨曉氣薄登臨半壁楚雲立一川湘雨深乾  
坤橫笛影江海倚樓心遺恨飛鴻外南來訪遠音

余題鬱孤泉五湖翁姚濂爲之和翁官滿歸里因

韻贄別

巢龜君住好涌翠我來遲夜雨呼三韭春風試一旗飛  
花行客夢芳草故人思何日五湖上同看浴海曦

天台杜澣字貴卿號梅壑糾合四千人欲救王室  
當國者不知省正月十三日見余于西湖上余  
喜其有志頗獎異之十九日客贄余使北梅壑  
斷斷不可客逐之去余果爲北所留後二十日

驅余北行諸客皆散梅壑憐余孤苦慨然相從  
天下義士也朝旨特改宣教郎除禮兵架閣文  
字

仗節辭王室悠悠萬里轅諸君皆雨別一士獨星言啼  
鳥亂人意落花銷客魂東坡愛巢谷頗恨晚登門

聞雞

軍中二十日此夕始聞雞塵暗天街靜沙長海路迷銅  
駝隨雨落鐵騎向風嘶曉起呼詹尹何時脫蒺藜



平江府

樓臺俯舟楫城郭滿干戈故吏歸心少遺民出涕多鳩  
居無鵲在魚網有鴻過使遂睢陽志安危今若何

沈頤家

余回京口北人歎之府中余不得離岸上得沈頤家  
坐臥北不意余爲遁計也

孤舟霜月迥曉起入柴門斷岸行簪影荒畦落履痕江  
山渾在眼宇宙付無言昨夜三更夢春風滿故園

余自皋亭山爲北所留深悔一出之誤聞故人劉  
小村陳蒲塘引兵而南流涕不自堪

只把初心看休將近事論誓爲天出力疑有鬼迷魂明  
月夜推枕春風晝閉門故人萬山外俯仰向誰言

來此持論太烈北愈疑憚不得歸闕將校官屬日  
有叛去者可歎

悠悠天地濶世事與誰論清夜爲揮涕白雲空斷魂死  
生蘇子節貴賤翟公門前輩如瓶戒無言勝有言

發東阿

東原深處所時或見人煙  
秋雨桑麻地春風桃李天  
貪程頻問堠快馬緩加鞭  
多少飛檣過噫吁是北船

海上

天邊青鳥逝海上白鷗馴  
王濟非痴叔陶潛豈醉人  
得當須報國可隱即逃秦  
身世何時定挑燈看劍頻

除夜

門掩千山黑孤燈伴不眠  
故鄉在何處今夕是窮年  
住

世真無係爲囚已自然勞勞空歲月得死似登仙

元日

慙愧雲臺客飄零雪滿羶不圖朱鳥影猶見白蛇年宮  
殿荒烟隔門庭宿艸連乾坤自春色回首一潸然

泰和

書生曾擁碧油幢恥與羣兒共豎降漢節幾回登快閣  
楚囚今度過澄江丹心不改君臣誼清淚難忘父母邦  
莫訝鄉人知我瘦經旬絕粒坐篷窗

和中齋韻

功業飄零五丈原如今局促傍誰轅  
俛眉北去明妃淚啼血南飛望帝魂  
骨肉凋殘惟我在形容變盡只聲存  
江流千古英雄恨蘭作行舟柳作樊

山中即事

攜壺藉草醉斜陽白鶴飛來月下雙  
蘆葉西風驚別浦芭蕉夜雨隔疎窗  
千年帝子朱簾夢一曲仙人鐵笛腔  
苦問山翁還瘦否手持漁竹下寒江

和韻送逸軒劉民章

少日屠龍事已勞，送人千里發江濤。  
蓬萊地近風方細，閭闔門開日正高。  
春裏看花須款款，雨中剪韭且陶陶。  
金吾已辦長安月，雙鳳扶雲立海鰲。

送人往湖南

雁挹寒月洞庭邊，客路淒涼野菊天。  
雲隔秋樽橫北海，風吹藜杖落西川。  
夜深鬼火千山雪，春後鶻花一樹煙。  
爲我祝融峰上看朝暾，白處禮蓬仙。

和蕭安撫平林送行韻

得失元來付塞翁  
何心桃李問東風  
人皆有喜榮三仕  
我尚無文謝五窮  
秘苑固知朋可正  
畏途猶恐甲方衷  
欲酬長者殷勤祝  
坎止流行學四忠

過萬安縣

青山共折水天平  
不是南征是北征  
舉世更無巡遠死  
當年誰道甫申生  
遙知嶺外相思處  
不見灘頭惶恐聲  
傳語故園猿鶴好  
夢回江路月淒清

覺海院

閣黎鐘後訪團蒲江色漫漫晝欲晡一笛樓邊河滿子  
千蓑蘆外筆頭奴急風吹雁還家未新雨生濤到海無  
本是白鷗隨浩蕩野田漂泊不爲孤

禪關

秋風吹日上禪關路入松花第一彎只願四時煙霧少  
滿城樓閣見青山

雲端



半空夭矯起層臺傳到劉安車馬來山上自晴山下雨  
倚欄平立看風雷

陳文龍

興化人度宗龍飛之歲擢廷魁第一元兵至  
興化不屈死有與仲子訣別詩讀者悲之

元兵俘至合沙詩寄仲子

斗壘孤危勢不支書生守志定難移自經溝瀆非吾事  
臣死封疆是此時須信纍囚堪擊鼓未聞烈士樹降旗  
一門百指淪胥盡惟有丹衷天地知

鄧光薦

名判以字行廬陵人宋亡避兵于廣東香山縣有題烏巖山詩又考其所居在本邑西南七十里遭土寇妻子俱焚死光薦脫走之烏巖與文天祥同舟唱和信國因序其東海集此宋史所未載者按此邑又有馬南寶者宋景炎二年端宗過此以其家爲行宮南寶竭力保衛宋亡悲憤不食嘗作詩有目擊厓門天地改寸心難與夜潮消之句後聞祥興尚在占城糾兵往迎遇元兵被執不屈而死

題烏巖山

歲云暮矣可奈何雲愁雨溼陰風多林壑摧殘海驚波慘澹一色無山河哀鴻嗷嗷舊枝柯飛天不容憂虞羅

深山短景孤鳥過會看明午風日和

鷓鴣詞

行不得也哥哥瘦妻弱子羸捩天長地濶多網羅南  
音漸少北語多肉飛不起可奈何行不得也哥哥

謝枋得

字君直信州弋陽人爲人豪爽觀書五行俱下一  
覽終身不忘少以忠義自任寶祐中舉進士對策  
極攻宦官奏名乙科除撫州司戶參軍即棄去明  
年復出試敎官中兼經科吳潛宣撫江東西辟差  
幹辦公事團結民兵以捍饒信因試士策問忤賈  
似道謫居興國軍咸淳三年赦歸德祐元年呂文

煥導元兵東下枋得以提刑知信州信州不守乃  
變姓名入建寧已而賣卜建陽市中有求卜者惟  
取米屨不受一錢久之程文海以人材薦辭不起  
行省參政魏天祐強之而北至京師問謝太后攢  
所及瀛國公所在  
再拜痛哭不食死

謝劉純父惠木綿布

嘉樹種木綿天何厚八閩厥土不宜桑蠶事殊艱辛木  
綿收千株八口不憂貧江東易此種亦可致富殷奈何  
來瘴癘或者畏蒼旻吾知饒信間蠶月如岐邠兒童皆  
衣帛豈但奉老親婦女賤羅綺賣絲買金銀角齒不兼

與天道斯平均所以木綿利不異江東人避秦衣木葉  
矧肩羞縣鶉天下有元德孔融願卜鄰綈袍望不及共  
裘志自仁贈我以兩端物意皆可珍潔白如雪積麗密  
過錦純羔縫不足貴狐腋難擬倫絺纈皆作貢此物不  
薦陳豈非神禹意隱匿遺小民詩多草木名箋疏欲諄  
諄國家無楚越欲識固無因剪裁為大裘窮冬勝三春拜  
嘉重感激觸物尤酸辛吁嗟彼寒谷鄒律今不神三宮  
坐穹廬雨雪或一句安得遣此惠飛到君王身塞上寒墮

指挾纊誰為溫人各賜兩端費銀二萬斤大軍四十萬  
談笑卻邊塵感君道義交何異骨肉親可與知者道衆  
人笑且嗔玉案未能報瓊琚情則真春秋二百年幣交  
幾君臣季札有贈好千古尚如新

黃禪師華嚴分供食有作

十兆九萬拜求道心如快毗盧頂上珠直欲一手探天  
廚送誰饌衆腹豈敢貪君有維摩心作繭憐吳蠶八萬  
四千供只須丈室函昔我聞晨鐘今載草堂柵流年急

如梭長歌愧仙籃  
勇尋趙州關何畏  
白髮鬚願為護法  
輪金甲持長鉞又  
恐回道  
人晚遇黃龍南

菖蒲歌

有石奇峭天琢成  
有草夭夭冬夏青  
人言菖蒲非一種  
上品九節通仙靈  
異根不帶塵埃氣  
孤操愛結泉石盟  
明窗淨几有宿契  
花林草砌無交情  
夜深不嫌清露重  
晨光疑有白雲生  
嫩如秦時童女登  
蓬瀛手攜綠玉杖  
徐行瘦如天台  
山上聖賢僧休糧  
絕粒孤鶴形勁如  
五

百義士從田橫英氣凜凜摩青冥清如三千弟子立孔  
庭回琴點瑟天機鳴堂前不入紅粉意席上常聽詩書聲  
怪石篠簜皆充貢此物舜廟當共登神農多智入本草  
靈均蔽賢遺騷經幽人耽翫發仙興方士服餌延脩齡  
綵鸞紫鳳琪花苑赤虬玉麟芙蓉城上界真人好清淨  
見此靈苗當大驚我欲攜之朝上帝太清瑤草不敢專  
芳馨玉皇一笑留香案賜與有道者長生人間千花萬  
草儘榮艷未必敢與此草爭高名



荊棘中杏花

牆東荒蹊抱溪斜荊棘狼藉盤根芽何年丹杏此留種  
小紅澌澌爭春華野人慣見漫不省獨有詩客來咨嗟  
天真不到鉛粉筆富艷自是宮闈花曲池芳逕非宿昔  
蒼苔濁酒同天涯京師惜花如惜玉曉擔賣徹東西家  
杏花看紅不看白十日忙殺遊春車誰家園裏有此樹  
鄭重已着重幃遮阿嬌新寵貯金屋明妃遠嫁愁悲茹  
落花紫簾拂牀席亦有飄泊沾泥沙天公無心物自物

得意未用相陵誇黃昏人歸花不語惟有落月啼棲鴉  
崇真院絕粒偶書付兒熙之定之并呈張蒼峯劉

洞齋華甫

西漢有臣龔勝卒閉口不食四十日我今半月忍渴饑  
求死不死更無術精神常與天往來不知飲食為何物  
若非功行積未成便是業債償未畢太清羣仙宴會多  
鳳簫龍笛鳴瑤瑟豈無道兄相提攜騎龍直上寥天一  
求紙衾

避世知無地，危身只信天。  
寧持龔勝扇，不着挺之綿。  
養性真同道，知心有宿緣。  
紙衾如墨絮，晴日臥雲邊。

送張子高歸延平

亂世讀書少，前人教子難。  
青燈嘗合席，紅葉趁歸鞭。  
梅自知春近，松應耐歲寒。  
樓高新月好，後夜與誰看。

示兒二首

門戶興衰豈自由，樂天知命我無憂。  
大兒安得孔文舉，生子何如孫仲謀。  
天上麒麟元有數，人間豚犬不須愁。

養男失教父之過莫視詩書如寇讐言

千古興亡我盡知一家消息又何疑古來聖哲少才子  
世亂英雄多義兒靖節少陵能自解孔明王猛使人悲  
只虞錯改金根字焉用城南勸學詩

題東觀壁 二首

觀外好看船往迴觀中幾度見桃開常瞻紫氣青牛去  
又帶白雲黃鶴來天地無情搔短髮古今多變付殘盃  
醉中尚有醒時眼不信玉山人可推

老樹猶能識道回，好懷長對碧天開。  
青山綠水何人管，明月清風要我來。  
少日曾聞黃石教，平生幾擲左慈盃。  
道凡慣見人間事，快抱棋枰信手推。

和曹東谷韻

萬古綱常擔上肩，脊梁鐵硬對皇天。  
人生芳穢有千載，世上榮枯無百年。  
此日識公知有道，何時與我詠遊仙。  
不為蘇武即龔勝，萬一同歸拜杜鵑。

魏參政執拘投北行，有期死有日。  
詩別妻子良友

良朋

雪中松柏愈青青扶植綱常在此行天下久無龔勝潔  
人間何獨伯夷清義高便覺生堪捨禮重方知死甚輕  
南八男兒終不屈皇天上帝眼分明

和道士陳天隱

豈不逍遙自采真世間何地可容身碧潭秋月元無物  
麗日祥風只愛春天上儘多知己友塵中安得見心人  
赤虬一躍蓬萊近又恐丹丘有宿因

題龜峰

三十二峰最高，脚踏高處，真人豪近，觀靈山一培塿。  
俯視彭蠡，無波濤，眼明始見滄海濶。心逸卻憐人世勞。  
後百千年誰獨立，萬古一覽皆秋毫。

按靈山一名靈鷲，在廣信府城西高

七千餘丈

送程楚翁遠遊

近日人傳庾嶺梅，南枝盡落北枝開。  
長安舊日元無此，盡是江南人送來。

春日聞杜宇

杜鵑日日勸人歸一片歸心誰得知  
望帝有神如可問謂余何日是歸期

竹

新篁娟娟如綠玉瀟然出塵澹無欲  
清風明月誰主張留得此君在空谷

扇

蒲葵也解歸掌握紈素未應捐篋中  
莫把暗塵浣明月



好驅大暑來清風

菊

淵明豈但隱逸人  
淵明素懷諸葛志  
清香不獨占秋天  
菊潭一滴三千歲

松

喬松磊磊多奇節  
冬無霜雪夏無熱  
根頭更有千歲苓  
知誰可語長生訣

花影

重重疊疊上瑤臺幾度呼童掃不開剛被太陽收拾去  
又教明月送將來

絕粒偶書

二首

丹府金童善主家百神聽命靜無譁從今何必餐松柏  
但吸日精吐月華

龜銜甘露爭先到鳳吸醴泉隨後來投在太清仙酒甕  
道人日飲兩三盃

瑞應宮

真人何代結幽棲累世奎章煥紫泥日月高奔黃道近  
衡廬旁出玉繩低

江萬里

字子遠都昌人少神雋有鋒穎連舉於鄉入太學  
有文聲理宗在潛邸嘗書其姓名於几上以舍選  
出身教授池州累遷著作郎歷侍御史至權參知  
政事為賈似道所忌丐祠歸聞樊襄失守鑿池芝  
山扁曰止水人莫喻其意及元兵渡江萬里七十  
六隱草野間為遊騎所執竟赴止水死事聞贈太  
傅益國公  
後謚文忠

龍虎山

鑿開風月長生地占卻煙霞不老身  
虛靖當年仙去後未知丹訣付何人

附天地間集

宋末流傳此帙合十七人存詩二十首專為一集題  
曰天地間集或取詩卷長留之意耶諸人行蹟無從  
盡考然其篇什得附文謝與則堂先生後又經謝高  
士鑒定則平日風尚諒皆可觀故仍之

則堂家鉉翁

寄江南故人

曾向錢塘住聞鶻憶蜀鄉不知今夕夢到蜀到錢唐

文山文天祥

再見

南華山

北行近千里迴復迷西東行行望南華忽忽如夢中佛  
化知幾塵患乃與吾同有形終歸滅不滅惟真空笑看  
曹溪水門前坐春風

逢有道者

誰知真患難悟此大光明雲散天仍在風休水自清功  
名幾滅性忠孝太勞生此意如能會神仙亦可成

本心文及翁

山中夜坐

悠悠天地間草木獻奇怪投老一蒲團山中大自在

疊山謝枋得

再見

武夷山中

十年無夢得還家獨立青峰野水涯天地寂寥山雨歇

幾生修得到梅花

南谷鄭協

溪橋晚興

寂寞亭基野渡邊  
春流平岸草芊芊  
一川晚照人閒立  
滿袖楊花聽杜鵑

錢塘晚望

錢塘江上夜潮過  
秋靜寒烟白露多  
吳越青山明月裏  
舟人齊唱異鄉歌

歸田柴望

月夜溪莊訪舊

山山明月露何處  
認梅花石色冷疑水  
溪流白是沙清吟  
幽客夢華髮故人家  
相見即歸去已應河  
漢斜

古為徐直方

觀水

滄江無盡水  
夜夜隨潮去  
若復作潮來  
滄江止不住

橫舟何新之



秋夜泛舟

飛星曳寒影野水淡碧空人生定何物扁舟空影中何  
年有宇宙生此木末風有力不向上難到蓬萊宮空攀  
棲鵲巢搔首如飛蓬俯仰慨今昔此懷安可窮

石髓王仲素

歸去詞

種松雨濯髮折筍春墮指長嘯歸去來滄江一天水

草堂謝 鑰

翫月有感

入夜茶甌苦上眉  
眼花推落石牀基  
舉頭却恨天邊月  
顛倒山河作樹枝

雲西陸壑

退宮人

破篋猶存舊賜香  
輕將魂夢別昭陽  
只知鏡裏春難駐  
誰道人間夜更長  
父母家貧容不得  
君王恩重死難忘  
東風二月垂楊柳  
猶解飛花入禁牆

菊屋何天定

散策

獨坐忽不樂出門聊散行  
溪喧亂人語樹偃碍農耕  
雨徑莓苔積陽坡草木明  
道逢九十老相對話承平

野處王曼之

春日郊行

出門逢柳色忽過野橋西  
坐石看潮長隔花聞鳥啼  
地隨芳草盡樹與夕陽齊  
不是桃源路行人亦自迷

西窓

西窓枕寒池池邊老松樹  
渴猿下偷泉見影忽驚去

觀山范協

年年

年年如燕一還家又訪幽居過水涯  
風雨滿城春欲暮  
山中猶有碧桃花

東窓吳子文

訪隱者不遇

道人入山訪道人山深俗朴雞犬馴道人不見道人去  
毳毼草木無邊春

竹坡韓某

采菊

擷我百結衣為君采東籬半日不盈掬明朝還滿枝悠  
然何處是千古正如斯

曉山林景怡

曉起

天雞弄喔咿殘星在斜漢整衣出幽扉山城漏初斷微  
微水風生冉冉田露散此時遊葛天淡然空百羨海色  
上寒梢漸識梅花面

右附文謝詩十五人內家鉉翁號則堂當元師南下  
次臯亭宋朝納降時吳堅為左相家鉉翁為叅政賈  
餘慶劉岳為祈請使北行至北則鉉翁獨得全節拘  
留河間至元成宗即位之初始賜衣服遣還鄉里年  
逾八十矣又文及翁字時學號本心綿州人與文山

公通譜由進士守淮郡素著清名

宋元詩會卷五十一



欽定四庫全書

宋元詩會卷五十二

兵部主事陳焯編

陳普

字尚德寧德人生宋末入元  
為遺民學者稱石堂先生

擬古 二首

東方有樂國開闢先  
柏皇鸞鳳為鷄鶩  
麒麟為馬羊晨霞  
作朝食太和為酒漿  
土無干戈禍人壽  
千年長下視

禹九州有土皆戰場白日虎狼行青天蛟龍翔我欲為  
遠遊滄海渺無梁何年夸娥氏移置天中央

同根一味草時命嗟異遇風月芳香合兩地隔周楚爾  
生麟趾家朝夕沐玉露我在雲夢林百草相蒙妬白璧  
終不緇惇惇亦良苦

壬辰日蝕

憶昔度宗皇帝時十年十三日食之似道顛願湖海曲  
天子宫庭耽樂嬉滿朝翕翕皆婦人禍來照鏡方畫眉北

軍順流日食既兩國正爾爭雄雌興亡豈必皆有數百  
年以來士氣衰文臣髀肉不識馬武士驚魄怕見旗

凭闌

高豁乾坤眼山青綠雨收夕陽流水遶荒草白雲浮柳  
蔭小溪側樵歌古渡頭凭虛發清嘯安得仲宣樓

德陽林梅麓太守輓章

殷士皆周祿南音獨楚冠寢車人更怒負俎我何安義  
合雍容就名應久遠看梅花真鐵石耐得許多寒

野燒

雜沓平原起電紅  
憑陵勢欲逼青峰  
草茅不問新開甲  
蟄戶尤憐乍啟封  
何暇屑侯分玉石  
稍如伯益逐蛇龍  
際天逸德無人識  
獨倚高樓到晚鐘

懷古

世事悠悠一轉頭  
斷雲荒草古今愁  
青山北去黃河隔  
白日西飛滄海流  
秦有金牛開劔閣  
楚無熊虎割鴻溝  
多情蕭寺峰前月  
幾夜蛩聲影半樓

答友人

雲作交遊山作賓  
道心為主自安貧  
柴門無鎖見同物  
竹帛有名終累人  
綠水一潭澄靜性  
青山萬疊裹閒身  
紛紛望拜馬蹄下  
不見胸中萬斛塵

秋日即事

五首

夜牀轉轆恨明遲  
曉髮梳寒倚竹扉  
樹影紙窓風作色  
蛩聲壁罅月流輝  
三杯白酒窮年客  
滿篋紅塵隔歲衣  
遥想白鷗江上路  
蓼花楓葉兩霏霏

玉露金盞正曉髮寒秋風仍作去年看蛩聲踈雨長為客  
雁影殘蟬獨倚欄鐵硯窗櫺雲影淡丹楓溪曲水痕乾  
西風曾與黃花約擬掇繁英貰酒餐

二尺書檠對影居西風吹雪上吟鬚雲邊月色人千里  
竹裏秋聲酒半壺客思邇來紅葉亂雁聲南去白雲孤  
季鷹自是知幾者一念尊鱸便到吳

書餘飲水枕長肱四壁啼蛩訴不平月色滿窓詩骨冷  
露華方枕夢魂清西風歲歲長堤柳流水朝朝大海萍

紅葉山深無雁過殘砧幾處搗秋聲

遊絲閃閃挂虛簷翔集號寒華嶽尖白髮東來問點易  
烏衣歸去寂鉤簾三千客路飛楓葉四五人家賣酒帘  
魚笛水寒江上晚荒叢荳葉雨纖纖

鼓瑟

滿樓明月調雲和五十絃中急雨過彩鳳拂衣鳴翠竹  
素鱗鼓鬣出寒波淒涼楚客新愁斷清切湘靈舊怨多  
一曲更沈人已靜江頭雲挂綠嵯峨

七夕

但把凡身小品論寧湏搨額問星辰  
女郎戀別淚如雨  
遑取金針度與人

四皓

長樂庖前露雪眉  
茁花亂笑出山時  
有人拍手瓜田裏  
來往青門總不知

李廣李陵

茂陵無奈太倉陳  
槐里家傳本助秦  
萬落千村荆杞滿



隴西桃李亦成薪

賈生

落日長沙被鵬驚  
愁來強把死生輕  
洛陽才子多流涕  
太息沾襟過一生

武帝

商車不足筭緡來  
桑孔咸陽悉茂材  
一撮茂陵無覓處  
建章門戶至今開

荀彧

亂離揀得一枝棲得道爭知却是迷曹操若逢諸葛亮  
暮年當作漢征西

謝翺

字臯羽福之長溪人文丞相開府延平翺以布衣  
諮議參軍天祥卒亡匿無恒處嘗持酒祭嚴子陵  
釣臺設天祥主號哭為招魂詞以竹如意擊石歌  
之詳西臺慟哭記後往來抗睡間以肺疾終其詩  
曰晞髮集格律  
蒼老直追古人

宋饒歌鼓吹曲

太祖嘗徵時歌日出其後卒平僭亂證於日為日

離海

日離海青瞳矐沃以積水涵蒼穹神光隱豹霧空氣呼  
吸為蛇龍赤雲衣紫霓從吹白衆宿歌大風天吳遁清  
海宮

宋既受天命為下所推戴懲五季亂誓將整師秋  
毫無所犯為天馬黃

天馬黃產異方龍為馬白照夜氣汗雲聲嘒野脩法衣  
引宸駕騰天垠倏變化閏之餘劑以霸閱八姓瞬代謝

驅祥靈入罟獲皇上帝監於下誓無譁出既禡市日中  
不易賈坐明堂朝諸夏賚萬方錫純嘏

汴京既定李筠懷不軌據壺關以叛王師討平之  
為征黎

黎之桎彌蒼莽迤壺關屬上黨有雄矯健曰餘宿將於  
故之思泣示厥像倚孽缺勢方張辯臣獻議勸下太行  
趨懷孟虎牢計之上爭洛邑以東鄉王師奄至扼其吭  
帝授方略中厥狀獸窮駭突死卒以煬脅從已逮孥肆

放凱歌回皇威暢

上親征李重進至廣陵臨其城拔之為上臨墉

上臨墉戈耀日韎韐指顧流電疾辜止其魁不及卒其  
魁則頑曰予號自出坐於轅門斧以率歸子往諭泣股  
栗語中其肝至畢述侍不及屏沮回適鞠投於燎甘所  
即皇仁閔下焉止蹕貔貅徹竈歸數實獲其棘矢納世  
室

湖湘亂命將拯之至江陵周保權已平賊出軍澧

南以拒卒取滅亡為軍澧南

軍澧南潰飛鳥鷹隼北來龍蛇夭矯帝有初命奉致討  
臨於荆妖孽既掃急驅而孕雉入蒼莽以保王旅長馳  
颯振槁以仁易暴戒擊剽惟荆衡及郴士如林磔其節  
蝨春葩秋陰我有造於南式敷德音

王師拯湖湘道渚宮高繼冲懼出迎悉以其版籍  
來上為鄰之震

鄰之震震於戶戒登陴徹守御神威掩至不及拒沿楚

以南菁茅宿莽獻於王吏奉厥土天子有詔侯西楚自  
南北東皆我疆龍旗虎節拜降王秦戈鞏甲期韜藏玉  
几肅穆垂衣裳

蜀主昚懼陰結太原獲其謀六師征之昚至以母  
託上許歸母數日昚卒母以酒酹地因不食亦  
卒為母思悲

母思悲母於歸母聞帝語妾歸無所妾生并土蜀壘茫  
茫奄失其疆初帝謂母子昚來小者侯大者王有瘼其

肌載粟於倉畢有下土方歸母於鄉天不女奪朕言不  
忘

劉錕亂嶺南為象陳以拒王師象奔蹠反踐俘錕  
以獻為象之奔

象之奔斯惟迹蹶蹶魚麗駕空雲鳥潰南草浮浮順於  
貌貅焚其帑寶棄厥陬皇風播平轂督星辰起皆北走  
唐季以來逆雛來味嶺海肅清無留後於汴獻囚凱歌  
奏



上命將平南唐誓城陷毋得輒戮一人衆咸聽命  
為征誓

帝命將臣誓師於征襍牙於庭曰無劉我人曲阿惟唐  
以及豫章孽於南國楚粵是疆我師孔武聿禽其王始  
怒頡頏將臣不懌曰如上命即起予疾弓韜於衣刃以  
不血收其石程焚其侈淫視於丁寧箬羽不飲取其縛  
磬以獻於京於京告成垓埏既平

錢氏奄有吳越朝會貢獻不絕於道至是以版圖

歸職方為版圖歸

版圖歸歸職方昔服跗注脩戎行帝錫之旂龍鳥章酌  
獻命與胥今上及秦王外臣拜稽首笑領帝色康畢同  
軌來於梁寵靈奕奕敷重光願止劒履覲帶裳四海臣  
妾配虞唐

陳洪進初隸南唐崎嶇得達於天子至是籍其國  
封略來獻為附庸畢

清源無諸邦力弱臣秣陵間道遣進表九門望日旌願

齒鄒與郛自達天子庭四鄰彫霸業國除洗天兵皇靈  
暢遐外蜚俗邇聲明歸其所隸州乞身奉朝請音清帝命  
得陪祀湯沐在王城從茲附庸畢歌以頌河清

宋祖征河東班師以伐功遺太宗卒成其志為上  
之回

上之回舞干戚鳴鑾在鑣士飽力桴鼓轟騰罕山北餘  
刃恢恢軍容肅穆王畿主辰參後服神繼聖伐功卒扼  
以偏師斷北脅矢敢鳴房蜩集的質子援絕新銜璧并

俗嘖嘖附於化以安得其屈產歸帝閑重譯君長來稱  
藩籥節傑樂示子孫

騎吹曲

親征

雲屯列竈驅貔貅殿前殺馬祭蚩尤勾陳蒼蒼太白溼  
賊帳夢驚繞營日軍呼萬歲推太行驂騶東抹流霓光  
重華繼堯坐垂拱并土再駕無葛疆

迴鑾曲

建隆親征回鑾

徂暑黎陽車駕歸掃清氛翳兵更衣江都朔雲車駕出  
凱歌消水供尚食都人引領望翠華征人一月俱還家  
開寶親征回鑾

長堤夜幸士素飽孤城沈寗無飛鳥從征鹵簿拜上恩  
太常朝上回鑾表

太平興國回鑾

都人望氣歸瑤闕星掃茸頭落參伐西人冉冉留紫雲

六飛擁日歌回軍

遣將曲

平荆湖遣將

天門雷動開風雲  
內前盡給羽林軍  
聖人神武授廟算  
斬將塞旗各駿奔  
王師所過如時雨  
洗濯焦枯嚮荆楚  
重宣德意弔遺黎  
素服軍前釋俘部  
全家到闕拜上恩  
詔書為築先臣墓

下劔門遣將

神風流霆驅偃草天兵夜下西南道虎賁長戟來鳳州  
歸峽銜枚疾如掃廟謨萬里諗諸將山川曲折圖形狀  
天同鬼授契若符坐滅果愚鹵供帳歸來論功授節鎮  
鐃鼓殿前歌破陣

歸朝曲

南平王歸朝

荆南萬里朝天道巫女雲荒產芳草錦韉道賜帶盤鵬  
方物南來進龍腦願陪郊祀依日光供帳歸朝親奉表

勲階邑食及隸人移鎮徐戎作家廟人生富貴侯與王  
四海為家皆故鄉

吳越王妃歸朝

勾吳月令牽牛中

妃以開寶九年五月隨王入朝

翟茀乘風來闕宮隨

王劒履朝上殿黃門夜趣長春宴昭容引班入內朝龍  
裘當中開雉扇宴罷朝辭坐局促詔賜離宮作湯沐先  
王烝嘗澤有差上恩許歌陌上花

諭歸朝曲



淮南草溼網蟲露  
家在先朝父尚主  
真人御極四海歸  
偃蹇不朝稱節度  
夜持鐵券為爾賜  
上恩特遣儀鸞使  
神離魄奪取族夷  
功臣效命錫龍旂

李侍中妾歌

李筠愛將唯儋珪  
美人姓劉筠侍兒  
城危搶撥不得力  
雨損鉛華帳下啼  
擁髻前言馬有幾  
猶說閨中那問此  
赤龍從東乘日車  
火繞城門內蛇死  
英雄際會風雲奔  
婦人思報羅裳恩

孟蜀李夫人詞

春荒曲薄蠶叢土屈狄歸朝辭廟主官家呼母恩許歸  
劒閣并門無處所故衣升屋棺四繞出門哭子汴州道  
回腸酹酒三致辭巴蜀如歸化啼鳥老身不食追爾魂  
鹵簿臨門拜上恩

南唐奉使曲

孤城圍中拜右史侍書猶對重瞳子請行慷慨期緩師  
奉命日馳三百里河流遡風車北首便殿蒙恩入天袖

臣肝有血不濺衣寸舌欲存建王後竒胷如江湧崔嵬  
慟哭不得天顏回

伎女洗藍曲

後庭朱黃作衣裏伎女帳帷青曳地碧綠夜挂寒不收  
緣此洗藍亭露水外間學染因得名不省歸朝為國氏  
他年寄生產鷓尾空憶宮中烏銜子

邸吏謁故主曲

嶺南使鶴日教戰巫女才人諢相見南撓欲載遠遊冠

衛士盜船去不還夢見隨俘上江邸道謁淒涼唯故吏  
自言置邸本先王方物入朝緣此至聞言含咽涕灑江  
况乃園人舊姓龐淚辭嶺南無歸處蒙恩祗向江陵住  
以上二十六首俱紀宋初事倣樂府另為一體不

入古今詩中

翠鑠亭避雨

亭有魏王妃所題字尚新王嘗以皇子成德軍節度使鎮南故妃至其處

客有遊山衣著久如薜荔行行萬翠亭忽作風雨愁仰  
面無所覩梁間有題字問此何人書婉婉有弱氣云昔

魏王妃學書似李衛乘雲到此山灑墨在空翠塵風吹  
土花倏忽景物異疑此夢與仙不類人間世

鐵蛇嶺長耳僧

嶺上有神僧風吹堅兩耳云昔垂至肩手提忽然起遊  
方得至術來此制蛇虺衣縫獨繭絲裂縫蛇盡死至今  
山下草食之蠱可已客去勿復言海隅多幻詭

九日前子善來會山中

朝尋寒露枝莫摘不盈把風吹西南雲幽情誰與寫有

客來縉州遺我古盞中有鴛鴦文色如銅雀瓦浮以  
鬱金黼蒼蘚藉其下此物寧足感聊用助歌者但懷郢  
曲悲豈計所知寡

九日禺中登沃州放鶴峰南望天台諸山

鏡面小蓬島入剡脫我驂舍櫂來沃州下嶺見精藍脩  
眉浮天姥天台在其南良遊愛九日巾墮髮不櫛醉浮  
秋夕英饑食決明實遠尋竺僧迹俯仰千載陳狂呼許  
玄度王謝十八人彷彿川谷應草未皆冥冥便欲即之

語又疑物所馮閉目遊泰初寥廓以為隣

因北遊者寄峨眉家先生先生曾宰建之浦城故

末章及之

靈關高縹緲縹緲出層城其上盤紫雲倏忽牛馬形交  
青不栖樹浴彼清泠泓惟有孤鶯鶯銜命此山靈迎風  
溯寥廓杳杳西北征羽毛中道折六月霜霰零回首靈  
關雲淚下如縣纓

擬古寄何大卿

四首

空山產桐梓擬作膝上琴琴成不他飾種漆江之潯獨  
無徽將軫何以發商音但得獨繭蠶飼之扶桑陰烹魚  
腹有膠不患海水深

雄雌雙碧鷄所食琪樹蔕來棲藥洞中當春怕乳子其  
雌秋別時守此唯雄耳可憐銜子歸萬里渡海水

流來山中花紺碧三百里漪漪歛硯雲含風入秋水五  
芝與八石往往產其汜豈獨祕靈文亦復隱奇士不見  
施家郎詩詞獨清泚一朝控白鸞吹笙洗塵滓



山人食木實竹實以飼鳳聞此來空煙三載脫塵鞅不  
見玉笙音唯聞溪鳥弄西臺憶故人野祭忽如夢仰視  
浮雲馳不覺哭之慟

效孟郊體

四首

閒庭生柏影荇藻交行路忽忽如有人起視不見處牽  
牛秋正中海白夜疑曙野風吹空巢波濤在孤樹

落葉昔日雨地上僅可數今雨落葉處可數還在樹不  
愁繞樹飛愁有空枝垂天涯風雨心涕零無所之寒花

飄夕暉美人啼秋衣不染根與髮良藥空爾為

越禽惜羽毛不向惡木棲木奴重踰淮愛爾巢其枝巢  
枝不食實中有二老棊乳子明月中夢繞東南飛

閨中玻黎盆貯水看落月看月復看日日月從此出愛  
此日與月傾瀉入妾懷疑此一掬水中涵濟與淮淚落  
水中影見妾頭上釵

遠遊篇寄府教景熙

朝遊扶桑根不折拂日枝莫食楚萍實掬海見虹霓黃

鵲別我影目盡漢水湄況復銜其子風露何當歸飄蕭  
入桂叢零落紫苔衣夢魂知爾處落羽在瑤池

古釵嘆

刑徒鬼火去飄忽息婦堆前殯齊發白烟淚溼樵叟采  
拾得慈獻陵中髮青長七尺光照地髮下宛轉金釵二  
持歸薰沐置高堂包裹恐為神所將妻兒朝拜復莫拜  
冉冉臥病不得瘥省知天物厭凡庸夜送白龍潭水中  
叩頭卻顧祈免死永入幽宮伴龍子

秋風海上曲

秋風吹水龍上天龍女抱珠海底眠水花生雲起如葑  
神龍下宿藕絲孔巨鼇顛鳳顛鼉鼓隨赤魚鱗鬣陳旂旗  
海人見此失捺網歸對妻兒月下紡自言移家來磧中  
十載秋風潮不上老夫一人語門前見此已是開皇年  
陌上桑

旭日曛曛颺拂羽落甚空條生曉霧人生顏色逐春妍  
夏葉餵蠶少絲縷蘭膏照繭未登簇露溼頭梳惟水沐

卻憐鄰女學鍊真藥爐  
七過煮桑薪縱逢蕭史上天去  
甕盆生苔愁殺人

種葵蒲萄下

戎葵花種蒲萄下  
年年葉長見花謝  
蒲萄漸密花漸遲  
開時及見蒲萄垂  
微風搖曳架上枝  
陰雲凝碧行琉璃  
天人下飲蒲萄露  
花神夜泣向天訴  
謝爾蒲萄數尺陰  
不如寸草同此心

古別離

仙人別母母哭啼遺以神藥乃醉之醒來哭定記兒語  
食此庭前雙橘樹葉能禦饑病能愈豈似當時逐兒去  
鄰翁有女立我前取刀剖腹爾勿憐但爾嫁夫能治田  
生子不願生神仙

書畫梅花水僊卷

風吹戰露明微照芳雲弱植仙姝廟髻鬟零亂在枕函  
月裏羅浮夢中到鮫綃拂塵蟬翼隔窓霧凝寒唯影入  
曉來坐對殘空標翠翎不見額黃溼

小元祐歌寄劉君鼎

前甲子小元祐句章祿黑權臣死端平天子初改紀襲  
芳泰陵種蘭芷當秋淮甸枯草黃彎弧北向射天狼是  
年南海無波浪月溼珠胎君以降只今六十空白頭獨  
騎麒麟補春秋天回星周美惡復人世更傳蔡州錄  
避暑城西觀吳道子畫老君像

溼煙挂龍天海頭角城溽暑如炎州白氛翳景失樓閣  
蓬萊縹緲不可求解衣揮塵子城下地湧青蓮隣古社

卷簾看畫人猶龍矯首見龍還見畫碧瞳雪髮垂過耳  
弄筆者誰吳氏子

有洗舊誥綾作青色鬻者以紺繒易得之作手卷  
賦小樂章求好事書其後

吳宮輦路傷行客  
蘭水壓雲凝曉色  
門前新掃染家鄰  
借人鋪設殘衣帛  
官花翦綾連院號  
覆取翻青成一道  
織紋宛轉勅字新  
知是初誰六尺誥  
城霞失彩宮蘚病  
中與海圖上衣領  
改顏倖售緣所遭  
褪藥玄香洗藍影



青綢易得淚承曉擊筑楚歌無故發歌殘求書好事人  
異代儻傳誥綾帖

廣惜往日

宋真院絕粒示兒宋禮部侍郎謝枋得所作也粵人  
謝翺用其語為楚歌以節之其詞曰

漢有臣兮龔勝卒噤不食兮四十日今忍饑兮我復渴  
道間關兮踰半月幸求死兮得死苟不得兮無術鳳笙  
兮龍笛燕羣仙兮日將夕風吹衣兮珮蕭瑟駿龍兮寥

天行成兮緣畢

瓊花引

后土祠前車馬道  
天人種花無瑤草  
英雲蕊珠欲上天  
夜半黃門催進表  
酒香浮春露泥泥  
二十四橋色如洗  
陰風吹雪月墮地  
幾人不得揚州死  
孤貞抱一不再識  
夜歸闌風曉無蹟  
蒼苔染根烟雨泣  
歲久遊魂化為碧

賦得北府酒

北府酒吹溼宮城柳  
柳枝着地春垂垂  
祗管人間新別離

離情欲斷江水語女兒連臂歌白紵淮南神仙來酒坊  
甲馬獵獵羽林郎百年風物烟塵蒼老兵對月猶舉觴  
青帘淚溼女牆下曾我行軍舊司馬

烏棲曲擬張司業

吳宮草深四五月破楚門開烏啼歇美人軍裝多在船  
歸來把弓墮弓弦越羅如粟越王獻宮中養蠶不作線  
輾轡出屋井水淺梔樹花萎子如繭烏栖烏啼宮燭秋  
越女入宮吳女愁

鴻門讌

火雲屬地汗流宇杯影龍蛇分漢楚楚人起舞本為楚  
中有楚人為漢舞鵬鵠淬光雌不語楚國孤臣泣俘旅  
他年疽背怒發皆芒碭雲歸作風雨君看楚舞如楚何  
楚舞未終聞楚歌

虞美人草詞

鬪髀起語鵠叫嘯山精夜啼楚王廟渡淮風雨八千人  
叱咤向天成白道身輕百戰轉危亡狼藉悲歌出漢堡

夜帳天寒抱玉泣血變草青烟曉溼他年辟仇春草生  
吳中草死無妾名自從為草生西楚得到吳中猶楚舞  
樊夫人上昇詞

四明山樊榭即漢劉綱與夫人樊氏上昇處

石蠓粘窻秋見海山雞夜啼弄花彩王孫吹笙導夫人  
青髮凌風素霞在雨塵離地白浩浩河西種星榆樹老  
海桑童童日出歸衣溼上池洗頭草

後瓊花引

揚州城門夜塞雪揚州城中哭明月墮枝溼雲故鬼愁  
西來陰風無健鶻神鴉愁空衆芳歇一夕蒼苔變華髮  
宮花織簾塵掩襪玉華無因進吳越灘灘淮水山央央  
誰其死者李與姜

冬青樹引別玉潛

冬青樹山南陞九日靈禽居上枝知君種年星在尾根到  
九泉護龍髓恒星晝霄夜不見七度山南與鬼戰願君  
此心無所移此樹終有花開時山南金粟見離離白衣

人拜樹下起靈禽啄栗枝上飛

此事詳見林景熙與唐珏詩中

極目 二首

南雁去來盡音書不可憑  
應過蠻嶺瘴聞拊楚臣膺  
滄海沈秦壁愁雲起舜陵  
可堪夢魂在回首舊觚稜

月離孤嶂雨尋夢下山川  
野塚埋鸚鵡殘碑哭杜鵑  
妓妝中使客民買內醫田  
到此聞鄰笛離情重惘然

槿樹

白犬吠行人西風杵白新  
洗香澄宿水曝髮向秋鄰  
野

草依溝盡宮花入帽頻人家小門徑憐爾獨相親

元日讀老子望瀑作

空山無轍迹縣水下分洪醉醒聽猶在寒暄色不同異  
書天姥秘靈物乳池空祇憶殘年雨先流到海中

雨中觀海棠

風吹簾網動對爾惜芳菲蜀雨何人在吳宮祇燕歸燭  
消春粉盡淚濕野香微抱蕊殘青子鳥銜隨處飛

哭所知



總戎臨百粵花鳥瘴江村落日失滄海寒風上薊門雨  
青餘化血林黑見歸魂欲哭山陽笛隣人亦不存

九日韶卿子善有約不至子靜亦歸桐廬與景雲  
飲瀑下

揉藍染釣緡欲老此江濱九日寒泉水他年白髮身隣  
州曾約客別業未歸人嗅菊知吾事那能更問津

呈王尚書應麟

寒風吹鬢影客淚溼衣塵千里見積水滿城無故人船

歌甌雪盡舞越花新獨憶絲綸老相從話所親

山陰道中呈鄭正樸翁

楊柳遠天色野風來水涯異鄉同夢客今雨故人冢越  
樹夜啼鳥禹陵冬落花悠悠江海意為爾鬢先華

哭肯齋李先生

落日夢江海呼天野水涯百年唯此死孤劬託全家血  
染楚花碧魂歸蜀日斜能令感恩者狼籍憫荒遐

八詠樓

江山此愁絕寒角夢中吹飛鳥過帆影遊塵空戰枝水  
交明月動槎狀故州移已薄齊梁士猶吟沈約詩

至日憶山中客

山村雲物外至朔閏年愁獨客語茅屋樵人共白頭驛  
花殘楚水烽火到交州欲隱裂裳帛春來重結裘

哭廣信謝公

自爾逃名姓終喪哭水濱海僧疑見貌山鬼舊為隣客  
死留衣物囊空出告身他年越鄉值賣卜有斯人

莫春感興

天涯芳草夢此意未應泯獨對風烟老虛為江海人漁  
樵分落日櫻筍過殘春舉世無知己他生應逐臣

送道士歸赤松

閒身可得仙諸妄覺他年夜氣浮秋井陰花冷碧田禮  
星逢鶴下咒食待人眠叩齒通玄解祠堂山影邊

西臺哭所思

殘年哭知己白日下荒臺淚落吳江水隨潮到海迴故

衣猶染碧后土不憐才未老山中客唯應賦八哀

題翁徵君集後

樵獵識冠裳何言志四方離秦風日冷過楚薜蘿長野  
夢違徵詔衰年枉薦章故山唐室晚應種禾為糧

夜坐呈韶卿

修行吳楚間鶴去杳難攀衰世已如此愁身更入山巢  
居避太歲藥飯救羸顏故友在江海相思不得還

寄育王賢上人

於今祇老身從昔少埃塵失蜀年為客居山石作鄰南  
遊宗竺法西語問巴人閉戶藤花落多浮茗碗春

海亭夜坐

孤身滯海垠暑溽上南雲歸日喜秋近愁人畏夜分坐  
涼依井氣眠溼動星文故友在山北音書不得聞

江上別友

相看仍慟哭欲學晉諸賢近風鳴柝江空雨送船朔  
雲侵別色南雪憶歸年擬共鋤青朮無為俗事牽

憶過徐偃王祠下作

徐王遺跡地花落舊壘巖阿山鬼下茅屋野雞啼芡蘿別  
祠江路見疑冢草間多寒食思家客空村記所過

雨中感懷

幽齋蒲稗裏夜色入柴荆坐久雨聲絕水深荷刺生聽  
猿思楚宿失鶴夢南征白屋青山下何年返舊耕

寺南小池

寺南疏小沼堤隱獺行踪杉影動寒水夕陽藏半峰清

涵落鳥毳寒却病僧容聞說初開日鉢盂盛養龍

己丑除夜

鬢絲殘雪影況復在塵埃暮色隨鐘盡年光逐水來隣  
逋燈下索鄉夢戍邊回明日聽春雨渡江登越臺

野望

心遊太古後轉覺此生浮天外知何物山中著得愁岸  
花低草色潮水逆江流消長盈虛裏令人白盡頭

商人婦



抱兒來拜月去日爾初生已自滿三歲無人問五行孤  
燈寒杵石殘夢遠鐘聲夜夜鄰家女吹簫到二更

悼古李清

典刑前一輩言語尚風流詩律縛不住梅花惱得愁雲  
烟今變滅老病總宜休喚醒菟裘夢嚴城山雨秋

雪後湖堤步歸

無求如有得散策隄邊行山碧眼花亂水寒毛孔生窮  
冬疑有雨一雪却成晴勞謝天涯月相隨步入城

書文山卷後

魂飛萬里程天地隔幽明死不從公死生如無此生丹  
心渾未化碧血已先成無處堪揮淚吾今變姓名

青筠亭

青山何處似疑是剡溪傍採筠無人到生莎滿徑荒水  
交難辨色花和不同香歸路逢樵子麻衣草結裳

沙岸登舟

五里兒女步虛沙映斷筇雲支半山石帆席上溪風數

雁憐身隻聞鶻願耳聾市橋東畔塔側影夕陽中

僧房齋壁

松樹落釵股曉行猶見燈圓亭方井水老寺少年僧澗  
響夜疑雨雲寒春欲層山童錯相認應道我來曾

疊山

礪硯復崔嵬晴雲撥不開鐘聞上界響石自太湖來靈  
草擣為藥寒松燼作煤欲窮登覽興未到已徘徊

歲月

歲月記不得曾行此處村日歇眠石影樹長食藤根晚  
羨棲猿鳥春來問子孫勞生空可說不是欲忘言

送汪十

多年隱賣漿此去結山房掃菌侵花落種松如草長老  
期秋欲至貧味水初嘗歲晚逢樵獵音書定不忘

悼南上人

翻經卷未終聞打寂時鐘盡說他身在惟應外國逢錫  
聲歸後夜琴意滿諸峰憶昨安禪處湖雲起白龍

送毛耳翁之湘南

湘草碧於水王孫尚此留  
一身行萬里雙鬢集諸愁  
月落衡雲曙龍逃海雨秋  
可能無事業相見竟悠悠

別子靜卻送之雪

獨往知吾事語離何所求  
故家無別業殘夢下扁舟  
積葉吳宮冷吟猿顧渚秋  
那能不相待羈旅負清遊

懷峨眉山先生

露下溼百草病思生  
積愁窟泉春洗屐  
瓊雪暮過樓魂

夢來巴峽衣冠老代州平生仗忠信心世豈相仇

遊釣臺

古臺臨釣渚遺像在蒼烟有客隨槎到無僧依樹禪風  
塵侵祭器樵獵避兵船應有前朝蹟看碑數漢年

早春寄嶺海流人

短褐隨南賈衰年異壯遊龍旂虛左个鴻影別中州晚  
避高麗使春乘百濟舟王孫與芳草相憶可能留

送人還蜀

白髮夢鄉國君歸路不迷狀槎秋見草荒棧夜聞雞月  
過秦涼北星流河漢西何因到却返吳語話分攜

憶梁禮部椅

閒庭芳桂叢相憶曙雲空文字能娛老莓苔此興同青  
山明月下家口少微東歲晚西莊路柴門語自工

孤山

又冒晴絲向水涯寒雲冉冉護巾紗能知綠鬢幾回至  
欲作黃冠此處家已把披垣等茅舍不愁封禪對梅花

卷五十二  
晚風吹袂過船去看鶴上天衝碧霞

中秋憶山中人

茲夕發清嘯為君楚舞終西風五陵夢涼露九霄中野  
邏煙常起溪流榜不通天陰無乳兔林盡見飛鴻溼溼  
雲垂髮兀兀樹偃弓劍歌玄武莫塵語白鷗空祇有淮  
南淚應沾青桂叢

雨宿太白

城中家斧冰此地絕炎蒸天食青童捧龍居白氣升暗



燈猶宿火寢服尚裘繒客話從前事書傳入內僧風流  
今獨盡雲物老相仍淨榻搜涼卧危欄入醉凭兩師行  
下界烏夢識中乘明發甬南去他山逢智弘

採藥候潮山宿山頂精藍夜中望海

蛟門南去鳥此地望迢迢積溼侵藩黑生寒入夢飄見  
燈歸舶夜聞偈解衣朝土植皆為藥山枝不滿樵暗光  
珠母徙秋影石花消擬候槎回漢寧甘客老遼卻尋徐  
福島因問秦皇橋於彼看日出羽旌焉可招

仙華山招隱

軒后悲蒼劒神娥下玉簫攀髯初失夢遺蛻尚凌歊碧  
墮升棺影青分產桂苗山精依鹿竹天雨溼雞翹有約  
成孤憤無人重久要豢龍因姓氏使鶴語軒輶冉冉將  
終老冥冥不可招無書寄青雀有恨在中條

友人自杭回建寄別

三首

同來不同去離別暗銷魂閩浙若同水扁舟送到門  
潮信到嚴瀨水色過衢城寄潮不寄水潮去有回程

水到衢城盡梅花上嶺生不如寄明月步步送君行

過杭州故宮 二首

禾黍何人為守閣落花臺殿暗消魂  
朝元閣下歸來燕  
不見前頭鸚鵡言

紫雲樓閣譙流霞今日淒涼佛子家  
殘照下山花霧散  
萬年枝上挂袈裟

重過 二首

複道垂楊草欲交武林無樹着凌霄  
野猿引子移來住

覆盡花枝翡翠巢

隔江風雨動諸陵  
無主園池草自春  
聞說就中誰最泣  
不冠猶有舊宮人

春閨詞

手觸殘紅頭懶梳  
香隨蝴蝶上衣裾  
暖風吹睡無言語  
又向牀頭看夢書

四皓

冷却秦灰鬢已翁  
紫芝歌罷落花風  
若教一出無遺恨

莫入留侯準儼中

蠟梅

冷艷清香受雪知  
雨中誰把蠟為衣  
蜜房做就花枝色  
留得寒蜂宿不歸

題酒家壁

綠陰深處問天涯  
黃鳥聲中覓酒家  
樹上老猿摘殘果  
向來纔見是春花


方鳳

潮人字韶卿由太學生授零州教授陳宜中當國禮下之同郡黃潛柳貫夙遊其門宋亡與謝翱吳思齊同志高蹈不問當世事思齊字子善永康人陳龍川外孫也

仙華山

仙華矗萬仞我乃廬其東日夕與山對今茲踏岑巖起左信奔鹿當前任啼狖大嘯崖石裂一覽天宇空蒼松飽風雨絕壑挂老龍樵斧不得晚撫根憇吾躬邈哉軒轅氏問道由崆峒龍髯一以遠千載悲遺弓猶傳少女靈鍊玉於馬宮山林重帝胄香火明民衷我來重懷古攬

涕臨西風何當速刺飛一洗磊塊骨



宋元詩會卷五十二